

ŠENTENCIJA MESOPUSTA „JANEZ“

2009.

AUTOR: RENE ŠEVERDIJA – TESLA

SUDAC: RENE ŠEVERDIJA – TESLA

ABUKAT: DANIJEL GRBIĆ

( STRANICA 0 )

SUDAC

Još smo skupa navon sviti  
Samoj leto više v riti  
I onon ki ovo piše  
Na glavi ka seda više

Pozdravljan te mili grade  
Spred najdraže mi parade  
Vinodolski lipi cvite  
Volin sako tvoje dite

Veli pozdrav simi vami  
Ki ste ovdí danas s nami  
Dok tuliko vas je totu  
Običaj je na životu

Jedan pozdrav va tuđinu  
Sakomu bibriskon sinu  
Neka ste mi duga vika  
Ne zabite svog zajika

Općinaron pusa vela  
Od celoga našeg sela  
Prodajete rog za sviću  
Ma van isto želin sriću

Pozdrav jedan v pulitiku  
I vladi i predsjedniku  
Vrhovnomu dirigentu  
Ki će brzo predat lentu

Još malo pa izbori  
Ki oće va Banski dvori  
Franjo, Stipe ki pak treći  
Doznat ćemo v drugon leti

I v merikah su birali  
A sul dreku pljusku dali  
Kakove su njin to finte  
Predsjednik je Kunta Kinte

Črne riti se posele  
Na kauč od kuće bele  
Ki tu sope a ki tanca  
Čera su pušćeni z lanca

Dokli mij još cela tiki  
Taka bin se pulitiki  
Kako komu ona paše  
Malo vanjske malo naše

Bliski istok kuha jako  
Nikomur nij tamo lahko  
Arapi su na istoki  
Židovima trn va oki

Izrael se granatira  
Veli toj u ime mira  
Ne divane baš istinu  
Kad ženi i dica ginu

Još vele da brane svoje  
Ameriki se ne boje  
Zač su od njih židi bili  
To oružje i dobili

Z borbu se tu niš ne minja  
Gine samo sirotinja  
Mor nij hamas nika sila  
Da bi židih sih pobila

Hrvatski pak dečki mladi  
Delaju red tamo v Čadi  
Još na straži tamo stoje  
Daleko od kuće svoje

TAMBUR

SUDAC

Čaj to prišlo ljudi dragi  
Plina ni va fajercagi  
Po celoj Evropi zebu  
I Putinu mater jebu

Kad su žepi skrozi prazni  
Rusija te lipo kazni  
Zapre ti ventil od plina  
A krivac daj Ukrajina

Poli nas je puno bolje  
Nit je znanja nit je volje  
Oporba krv slamkun pije  
A vlada se samo smije

Vlada nan se lipo smješi  
Oće narod da utješi  
Kad spomene niki krizu  
Vele da te nij ni blizu

Neka se i dalje smiju  
I istinu neka kriju  
Po glavi se sumnja mota  
Toj smih Judi i škarjota

Narod niš ne poduzima  
Još zalihi nike ima  
Šuti narod ljudi moji  
Zač se noći saki boji

Problemi su to gorući  
Oružjaj va sakoj kući  
Zato prije neg zaškuri  
Narod mirno doma žuri

Kad za divan nisi svaćen  
More bit ki i podplaćen  
More v noći bez miseca  
Ukokat te kot i zeca

Uvodne su ovo riči  
Šentenciji to priliči  
Na JANEZUJ sa krivica  
To znadu i naša dica

Optužujen njega valje  
Abukat neg brine dalje  
Sud ću dobit na pol gasa  
Za JANEZA nima spasa

TAMBUR

ABUKAT

Sil pijan ti il drogiran  
Ov put ja san skrozi miran  
Pametno ću ovo vodit  
I JANEZA oslobodit

Ali prvo pozdrav simi  
Pa neka se draga dimi  
Dokazat gren da nij krize  
Va čarapi su devize

Peći smo na drva klali  
Tako plina nan ne fali  
A četrtu kuća saka  
I centralno na ložaka

Kadi dimnik pak ne dimi  
Važgane su totu klimi  
Da me sudac ne bi sjebal  
Nikogar nij kij ozebal

Paradu pak vino grije  
Ki ozebe ta popije  
Pa in se črvljene lica  
Srce grije trobojnica

Na JANEZA nen krivicu  
Zatu plinsku nestašicu  
Nij kriv JANEZ ni dežela  
Ča nediljun se ne dela

Nij ni on bez duši biće  
Nij kriv ča su plaće piće  
Za bespravnu nij kriv gradnju  
I propalu brodogradnju

Zato ti predlažen suče  
Da optužba se povuče  
Neka odgovara drugi  
Ča nan vanjski rastu dugi

JANEZ je žrtveno janje  
On nij hodil na skijanje  
Ni na doček van granice  
I nij prodal dijonice

Nij aktivan već va seksi  
Nit prodaval je indeksi  
Neć ga krivit to zajebi  
Za ubistva va Zagrebi

Nedužan je ča su niki  
Pili kompot od buniki  
Pa postali prepečenac  
Zato nij kriv ov Slovenac

Suče daj se ti ohladi  
Optužnicu šporhet kladi  
Ponudi mu dobru trampu  
Pa morebit digne rampu

TAMBUR

SUDAC

Abukate ja te žalin  
Prišlo mij da te opalin  
Laži lete ti z gubice  
Zbog Slovenske izdajice

Ali prit će vrag po svoje  
Na kraji se mrtvi broje  
Neć mu spasit ti života  
Cela Hrvackaj porota

Sjebal si nan ko god leto  
Za Evropu udril veto  
Zaustavil pregovori  
Neć se kupat v našen mori

Ja se neću s tobun mučit  
Pošten narod će odlučit  
Prija najzadnjega slova  
Gremo vidit jel ča nova

Niš se letimi ne zbiva  
Bribir sanak zimski sniva  
Osin čaj na kuli staklo  
Niš se drugo nij pomaklo

Vraćaju se proračuni  
Ma se narod niš ne buni  
Već va maji su izbori  
Otel isti sidit gori

Načelnik se novi bira  
Z Grižan, Triblja il Bribira  
Zamjenik i vjeće novo  
Narod oće birat ovo

Kašnje nesmimo se žalit  
Ako ne bu š čin se falit  
Sami krojimo sudbinu  
Za Vinodolsku dolinu

Ki god dobi na izbori  
Fanj ga dela čeka gori  
Triba za sna se probudit  
I narodu nič ponudit

Triba minjat krvnu sliku  
I na Guči botaniku  
Tamo cvatu najiloni  
Tetrapaki i kurtoni

Za udruge više kuna  
Od općinskog proračuna  
Branitelj on povišicu  
Dvi ljuljačke za dičicu

Sredit puti od prometa  
Ko čaj sada do Potpleta  
I zadruge više moće  
Neka sadi ki ča oće

Va dolinij lipa slika  
Dva su vela maslinika  
Triba rešit saku stopu  
Prija neg ćemo v Evropu

Prvi put ovoga vika  
Glasat ćemo za čovika  
Ne za stranki i programi  
Krivci oćemo bit sami

#### TAMBUR

#### ABUKAT

Odi beno ča ti fali  
Finili su Mare bali  
V politiku se ne pačan  
Nisan žejan niti lačan

Neg mi smeta ča nij lani  
Bil nogomet na pilani  
Ni esada niman mira  
Ča nij bilo tog turnira

Vela pljuska našoj vladi  
Ča sidi va staron gradi  
Nij sporckoga u njih duha  
Pa nimaju za to sluha

Neg je ona pasja vira  
Koštala ko tri turnira  
Evoj krivac spred parade  
Čaj va gradi pival Rade

Črni Rade Šerbedžija  
Dočekan je ko mesija  
Neznan ki muj pleća čuval  
Na Hrvackuj nigda pljuval

Voli onog ki te gazi  
To smao u nas prolazi  
I bez trubi i tambure  
Sto tisućic za dvi ure

Da se KUD-u pipa opre  
Saki dan bi bile smotre  
Ko čaj bilo na Petrovu  
Oćel Bože i za ovu

Turističkaj dala dari  
Ča su jili naši stari  
I domaći i furešti  
Si su pili na toj fešti

Tuji KUD-i gostovali  
A naši je darivali  
Va pivi se grlo pere  
A od Hrilji su vičere

Još o KUD-u dvi junačke  
Za jeseni Vinkovačke  
Dva dana smo tamo bili  
I tancali i hodili

Nošnju smo in pokazali  
Sega glasa zapivali  
Evoj kola kogaj volja  
Nij bila ni jedna bolja

Kulen, šljiva, tamburica  
Stvarnoj lipa ta ravnica  
Prošli smo i ono malo  
Vukovara čaj ostalo

Tamoj oltar domovine  
I suza ti tu ne gine  
Netaknut si Bribir grade  
Tebi neka piva Rade

TAMBUR

SUDAC

Gren do svoga sad pajdaša  
Do Daria tamburaša  
Voli malo stisnut sasci  
I v gaji uzgaja prasci

Tri praščići jako živi  
Ne pitomi nego divi  
Otac Božo baka Ane  
Pomijami blago hrane

Veprići su atrakcija  
Šla jej vidit i Marija  
Posjetit će vepri mladi  
Pa će doma pravit Vladi



Praščići su dosta nisko  
Travaj mokra fanj je sklisko  
Kako sej tu samo bila  
Na guzicu skoprčila

Ki juj dizal nij mi rekla  
Jel guzica joj otekla  
Doktor Vladej vižitiral  
I va octi rit masiral

I Darioj doli v gaji  
Zamalo ostal bez jaji  
Ne znan točno danaj koga  
Šal po prasca četrtoga

Toj mrcina bila stara  
Pripeljal gaj z Bjelovara  
Da se v mali on ne dira  
Dario ga izolira

Gajbu Dario pokriva  
Kiša koti z kabla zлива  
Prasca ne smi ničin rajcat  
Kad bu z nutri šal podšprajcat

Ali blago nima mira  
Na kljove ga nabost smira  
Kad najjačej tukla kiša  
Rasparal gaj niže miša

Krv šiba kroz traperice  
Jedvaj zišal zote žice  
Ranaj bila fanj duboka  
I suzaj potekla z oka

Mislin da su mu i bili  
U doktora nogu šili  
Maj spoznaja bila slaja  
Da su celi miš i jaja

Na kraju se mrtvi broje  
Ta vepar je dobil svoje  
Finil je ma ne na paši  
Neg va škrinji i gulaši

TAMBUR

## ABUKAT

Kladi v grkljan malo pivi  
I ostavi prasci divi  
Po pitomi gre ekipa  
Dva komada vela lipa

Živaj ljudi to istina  
Prasci Žari Mandičina  
Prošlu jesen ne prolića  
Ponjej šal do Ivanića

Ovo kodaj bilo čera  
Stilini su š njin z Batera  
Do gori su požurili  
Prasci brzo su kupili

Do prasac va kamioni  
Kukuruza dvi – tri toni  
Kupili su i posije  
Red je da se to zalije

Put do nazad dugo traje  
Kraj sakog se svitla staje  
Litrica sej makla peta  
I uraj već pol deseta

9.

Sunca zraki su nestale  
Po škuru su prišli v Štale  
Prasci ote v kotac spraviti  
Ivanka će jist pripraviti

I Sanjin in daje ruku  
Prvoga va kotac vuku  
Žara riva ma nij trezan  
A kucak je Reks odvezan

Dokli s prvin borba traje  
Na drugoga kucak laje  
Reži, laje bez pardona  
Skače prasac s kamiona

Na prvuj zletel livadu  
I okrenul prema gradu  
Prasac biži, Reks ga prati  
Otel Bože do Renati

Ovo dobro finit neće  
Potjera za prascen kreće  
I Žara za blagon grabi  
Izgledi su dosta slabi

S ravnožežun on se bori  
Dva put pal je med suhori  
Pomori mi Bože sveti  
Jel već prase u Rupeti

Imeli su mrvu srći  
Zada kuće od Zebići  
Tuj prase va ulnjak palo  
I ekipu dočekalo

Na cistu su ga potegli  
I na prasca se pogleli  
Milu Dražića su zvali  
V Kediju ga otpeljali

Lanjski prasci nisu živi  
Ča su bili vavon štivi  
Nego se va Štalah oni  
Lipo suše na balkoni

#### TAMBUR

#### SUDAC

Za penzići dvi tri riči  
Moramo reć, to priliči  
Doček Nove tu va Sali  
Zaslužuje se pohvali

Tancalo sej, jilo, pilo  
Si divane lipoj bilo  
Penzići su se delali  
Kuhali i podvarali

Ovo leto su jin bili  
Prosjek godin popravili  
To penzići v srce dira  
Mladi pari tu z Bribira

Lipo ih je vidit bilo  
To starijin pride milo  
To stariji lipo vide  
Znači da ih se ne stide

Mladi su in isto dali  
Za ta doček se pohvali  
Atmosferaj strašna bila  
A čaša se nij razbila

Za pol noćun kolo kreće  
Ovo se pozabit neće  
Evo kola ki ga voli  
I mladi su tu va koli

Kad pogljedaš priko stola  
Vidiš narod Vinodola  
Društva lipa i velika  
Z Bribira do Drivenika

Glazba in je dobra bila  
I sih je zadovoljila  
Si tancaju, stari mladi  
Denis glazba dušu gladi

Čovik stvarno volju ima  
Kad pogljeda da se štima  
K srcu mu se to privija  
To postaje tradicija

Doček Nove v našoj sali  
Ovo posli nisu mali  
Penzići su puni volje  
Misle kletu još i bolje

Si do kletu živi bili  
Na dočeku se vidili  
Ljudi, ženi prit te simo  
Da se skupa veselimo

Ovo bin podvukal malo  
Do četerte sej tancalo  
Lete nogi hopa cupa  
Da Bog da i kletu skupa

TAMBUR

ABUKAT

Kogaj bilo to miseca  
Va Bufeti dela Eca  
Kraju bliži joj se smena  
Birtijaj već pometena

Uz gemiš i kvarat pive  
Tuj Vodnik i Šimac Ive  
Kad je zadnje popijeno  
Stigal je po Ecu Neno

Još su rundu na stol zvali  
A onda su se rastali  
Zlatko doma gre pišice  
Za razliku od Ivice

On auton v Rošće selo  
Zač jutro mora na delo  
Kad sej čeljad ta pobrala  
Ecaj Bufet i oprala

Neno š njun je nij va škuri  
Prisustvuje inventuri  
Onda će natenane  
Sa BMW-on va Grižane

Oprani su i šekreti  
Gase svitlo va Bufeti  
A kad vani vidi vruga  
Od BMW-a niti traga

Dal se dragi s Ecu šali  
Mor BMW nij tako mali  
Ključ si pustil va bravi  
Auton se sad pozdravi

Taman da će proć pišice  
Spaze opel od Ivice  
Protrnuli tada skrozi  
Šimac se v BMW-i vozi

Za njin v Rošće poč se mora  
Dozvali su i Davora  
Pa vječaju ovdi v gradi  
Jel BMW još va komadi

Morda još je na životu  
Va Podskoči kreću sprotu  
Na Parčevon tek potoki  
Ne veruju svojen oki

Šimac se s BMW-on penje  
Maj totalno zamračenje  
Zavo nen ga ovdi falit  
Svitla nij znal ni upalit

U Začeka s cisti skreće  
Dalje on po škuri neće  
Pijanoga kot i vola  
Sustigla gaj tu patrola

Eca tu mu dopovidi  
V tujen auti da sidi  
Ćil po nosu il po bradi  
Mor je tvoja vektra v gradi

Va BMW-a sida Neno  
Srićaj dobro se fijeno  
A Davor će z vrh tog sela  
Peljat Šimca po opela

#### TAMBUR

#### ABUKAT

Ista kuća isto selo  
I ovo gre na videlo  
Liki miša teta Mica  
Naša bivša poštarica

Našlaj sebi hobi pravi  
Ljekovite bere travi  
Kuha čaji i vodice  
Eliksiri i mastice

Da ti bolje stoji bena  
Mastica tuj baš od hrena  
Ki ne more imit dice  
Čaj prepíše od preslice

Koga srbi okol riti  
Tri puži va ocat hiti  
Od pelina i metvice  
Sredstvoj protiv žgaravice

Kada srbi te pizdica  
Rumenijej tu mastica  
Ako imaš vele krasti  
Za to su od puha masti

I Dušan pomaže malo  
On topi i miša salo  
A najviše brine Micu  
Još nij lika za Ivicu

A materij vela želja  
Da joj snahu on pripelja  
Da za ženu bude vezan  
I dva dni da bude trezan

Kako da ta lik pripravi  
Tu će tribat jače travi  
Oće kuša i koprivu  
V Karlovačku mišat pivu

TAMBUR

SUDAC

Sigurno ste to doznali  
Dogodilo se na Kali  
Glavni akter jednaj žena  
I nesritna purpen pjena

Kamp kućicu su na Kali  
Zvona Tus i Ivka klali  
Pa se lipo nutri griju  
Vikendicu dokli ziju

I namještaj zgoru sele  
Ote brzo da presele  
Bit će hiža Zvoni Tusa  
Useljiva do Uskrsa

Kad poneštraj već kladena  
Triba našpricat purpena  
Ostavil gaj Zvona prije  
Kraj šporheta da se grije

Dok frajka va vikendici  
Ivka kuha va kućici  
Lonac vodi na šporheti  
I ideja na pameti

Purpen v lonac će umočit  
Na kafu do Anki skočit  
Steplit će ga misli ona  
Oće ju pofalit Zvona

Nij šla zatin jadna žena  
Daj pod tlakon purpen pjena  
S Ankun se zadivanela  
Kad zakuhalaj padela

Spregal drek je va guzici  
Kad je puklo va kućici  
Kot Vukovar devesprve  
Samo malo manje krve

Teče Zvona, ženi lete  
Na procjenu gredu štete  
Se sej živo razletelo  
I niš nij ostalo celo

Ni frižder ni pećica  
Ni šporhet ni termosica  
Pjena ušla va kušini  
I v ladice na vitrini

A na zidih lipe freski  
Sveci kljanu se nebeski  
Da šteti ne budu veće  
Zvona valje doma kreće

Ivka na Kalij ostala  
Bil se smela, bil plakala  
Plakala zač onaj kriva  
A smela se čaj još živa

#### TAMBUR

#### ABUKAT

Sad bi otel se po redi  
O Paradi dvi besedi  
Za oni ki žive vani  
Gren reć ki su kapetani

Već ko leto ima v riti  
Sin od Žarka i Aniti  
Tradicija kapetana  
Još od deda mu Ivana

Veseljak je i bez pića  
Vnuk od Tihi Ligatića  
Za običaj srce tuće  
Dok za pason sablju vuće

Zapadnaj Bribirska strana  
Isto dala kapetana  
Lipo piva stvar je stara  
Vnuk od Anice z bunara

Za običaj sebe daju  
Želin da još dugo traju  
Da Bog da in staži bili  
Kot od kapelnika Mili



Niki nisu se rodili  
I materi mliko pili  
Nisu znali čaj to kurac  
Kad je krenut Svetojurac

Najstarijaj on krabulja  
Ma stoji mu natresulja  
I kad ode on bi rada  
Da zasvira mu parada

Na paradu odozgora  
Nij ni jednog prigovora  
Mladost ta se odazvala  
Na četiri karnevala

Grižane i Crikvenica  
Gredu stari i dičica  
Samoboru leti pusa  
Tamo kreću sa dva busa

Gre staro ma gre i mlado  
Saki će na izlet rado  
Trobojnice, gaće bele  
Trube, bubnji i činele

V nošnjah curice i žene  
Dobro su podobučene  
Sto litar Istarskog vina  
To se zove poputina

Žarko gre a š njin i Želja  
V kombiju magarca pelja  
Čeduljicu dok ne zgubin  
Magarac se zove Rubin

I Oskar je tu va busi  
Slaže čaše kot i kusi  
A sendvići sponzorira  
Jedna stranka iz Bribira

Rekal san i na sastanki  
Da Narodnoj fala stranki  
A ponavljan i va gradu  
Zoranu i Miloradu

Do gori smo kratko stali  
Malo jili i pišali  
Samoborsko sunce grije  
Od birtije do brtije

Dečki ča su uz magare  
Pred birtijun mlate pare  
Deset, dvajset je slikanje  
Dica moru i jahanje

V povorki smo prvi bili  
Sih na bini pozdravili  
Žarkoj moral iskat para  
Sam nij mogal vuć Oskara

Mi popili, trezna dica  
Ane falelej patica  
Zatoj prišla teta Mira  
Gljedat svoje iz Bribira

Kad je finila vičera  
Mi krećemo put Kvarnera  
Bubanj i muziku malu  
Direktno smo prišli v salu

A na kraju lipa slika  
Opet gljeda nas i Rika  
Par let nij va tomu gradi  
Bilo nošnje ni paradi

TAMBUR

17.

SUDAC

Šesnajst dan san bil va kurci  
Kad su nan zabili Turci  
Znadu dica i stariji  
Toj bilo va Austriji

Cela gljedalaj planeta  
Prvenstvo od nogometa  
Misleli smo da smo v raji  
I primili gol na kraji

Jedno gren povidit rado  
V Austrijij bil i Dado  
Bandira i kumpanija  
I supruga najmilija

Zauvik je željan puta  
Ne zanima ga valuta  
Ni va koj smo disciplina  
Bitno daj on na tribini

Od Poljuda do Brazila  
Sagdiy noga ta kročila  
I bandiraj sagdi bila  
Osanspet kil čista svila

Obećal je prnest liki  
Iz prvenstva va Afriki  
Oćel Bože zdolu brodon,  
Pišice il avionon

Samo nek ga prati srića  
Imal još takova bića  
Kapa ovdi mu do poda  
Takovih ne nosi roda

Si smo skupa zadrhtali  
Va Zagrebi na finali  
Zgubili su va ton boji  
Rukometni kauboji

Do finalaj teklo fino  
Dobroj to posložil Lino  
Oćemol to kada shvatit  
Da se uspjeh ne smi blatit

Dok v Kinij skakala Blanka  
Na srcih je bila stanka  
Nami pak ni to ne valja  
Samo srebrna medalja

18 .

Mržnju ovdi ja ne širin  
Ma se teško sotin mirin  
Krivica to nij kineza  
Nit amera neg JANEZA

Sagdi kratki smo za dlaku  
Smrt za njega želin laku  
Krivac si za naše muki  
Sad oć past od moje ruki

Neć već gljedat ti Triglava  
Otpala ti ovdi glava  
Poćinut oć sad na miri  
Tudi tukaj va Bribiri

(UDARAC SABLJUN)

TAMBUR

## OPORUKA

ABUKAT

Navoj strani se servira

Uviki frizerka Mira

Pundža, trajna i vikleri

Finili su v prošloj eri

Mirovinski troši novci

U matere čuva ovci

Saki dan je ona doli

Ovce svoje jako voli

Zato delo ima dara

Finjuje za živinara

Nagnala juj viša sila

Samaj ovci ojanjila

Stel vi ljudi zato čuli

Triba ruku rinut v uli

Gljedalaj to Mira doma

Nigdaj tako otac Toma

Živinar joj se ne javlja

Na delo se Mira spravlja

Želudac joj se okreće

Ma odustat sada neće

Sa sej bila tu spotila

Doklij ovci ojanjila

Bože dal zna majka Mica

Da joj je hčer i babica

Mesopust joj želi zdravlja

I za kletu joj ostavlja

Dvi gumene rukavice

Kirurški nož i škarice

-----

Ovdij jedna ostavina

I za brata joj Pipina

Va hrastića za mobilju

Stol, stolice i postilju

Radni trliš od mesara

Zaminil je za tišljara

Pila, dleto, nož i blanja

Toj alat od novog zvanja

V gori stalno delo ima  
Narudžbe od sakud prima  
Lipi stoli a i klupi  
Tu cenije narod kupi

Al Bribiri mu pred vrati  
Kradu drva niki tati  
Odu drva u dva petka  
Bez oružja i bez metka

Rukomet polufinale  
Da ča čuješ šansi male  
Televizor je do daski  
Ne čuješ od groma praski

Utakmicu Pipin gljeda  
Ma videla jej suseda  
Tovarili natenane  
V karavana dosti stane

Svedok sad postoji živi  
Autoj karavan sivi  
Biloj škuro ne po dani  
Sul vozili ga cigani

Drugi petak vrag te jebo  
Oprlo sej celo nebo  
Da mu se zatrlo sime  
Ki krade na pasje vrime

Inventura kad je pala  
Još dva metra su nestala  
JANEZ veli v oporuki  
Osušile mu se ruki

TAMBUR

SUDAC

Za Paradu želi zdravlja  
Nanje on ne zaboravlja  
Ostavlja in dvi vinjeti  
Da koriste vavon leti

D obajdu v jednon danu  
I Maribor i Ljubljanu  
Ako se ki uneredi  
Nek okupa se na Bledi

Sitil sej i kapetani  
Ma tanje neg onaj lani  
Ostavina jedna mala  
Viljamovka od fruktala

Svetojurcu rasnon tenku  
Jednu mlajahnu Slovenku  
Nek joj va Slovensku školju  
Rine celu natresulju

Evdij stala jedna mića  
Za Ivicu Vlastelića  
S paradun po selu gazi  
I na svoje zdravlje pazi

Kad Podgori se pozdravlja  
Jel on totu krhka zdravlja  
Antonac mu vino toči  
Još je dugo do Podskoči

Ivicij na mesti saka  
Veli nesmin pit zbog tlaka  
Aco pomoć gre Ivici  
Tlakomjer je va ladici

Ambulantaj potez pravi  
Piju samo ki su zdravi  
Stodvajset sa osandeset  
Ti oć živit stopedeset

Valje ruka čašu grabi  
Daljnji pregled mu ne rabi  
Sa tlakon je se u redu  
Pa dalje po selu gredu

Bubanj tuće zvono zvoni  
U Pađena već su Toni  
Opet Ivicij nervoza  
Ovdij druga dijagnoza

Nen pit veli on susedu  
Zač mi cukar nij u redu  
I Tona tu bolest ima  
Aparat z vitrine znima

Mladog dečka će umirit  
I cukar mu oće zमित  
Boja vrnjenaj va lice  
Cukar okolj šestice

Još jednuj čul od Ivice  
Koči ga spod lopatice  
V Toninon se oće stani  
Opružit na otomani

Ka ura na crikvi zvoni  
Ive hrče još u Toni  
Priključil sej bil paradi  
Jel v Podskoči ili gradi

Mesopust mu želi zdravlja  
Nešto lipo mu ostavlja  
Mahramice jedne vlažne  
I dvi sestre patronažne

Krv, tlak, cukar, salmonelu  
Kletu mirit će po selu  
Ki trezan zdrži do kraja  
One te mu praznit jaja

#### TAMBUR

#### ABUKAT

Krsti pozdrav od paradi  
Čekaju ga dečki mladi  
Da pivaju pisme stare  
I konate uz magare

- - - - -

Sakomu našen diteti  
O Kekecu dvi kazeti  
Elanove nove skije  
Zubi ako ga zavije

Mladin lovcen dva tri mufi  
I praščića za tartufi  
Neka išću skupe gljive  
Jeleni se već ne krive

Arbi gubac od železa  
Od nikoga da ne spreza  
Još curicu jednu živu  
I studenu malu pivu

Ovo kodaj bilo čera  
Gremo malo do Kičera  
Biloj sega ajme meni  
Kćer Jelenu Jere ženi

Puno svita tuji naši  
A sviraju tamburaši  
Pisma teče se se ori  
Zada kuće va šatori

Po običaju i navadi  
Posli crikve staju gradi  
Šampanjac se tu opira  
V Zagori se dalje smira

Kolona gre, se se praši  
A zadnji su tamburaši  
Preteć će kad bu prilika  
Prva mora bit muzika

Ligatićuj volan v ruki  
S preticanjen nima muki  
Mesto bira malo bolje  
Oće preteć ih kroz polje

Gumi nove a ne stare  
Livun stranun golfić tare  
Već smo poli barutane  
Svitla nij sa kontra strane

Odjedanput Jole koči  
Zač konji ne svite v noći  
Na srid cisti konj ta stoji  
Direkt sudar ljudi moji

Konj nij ostal totu miran  
Od golfaj nokautiran  
Jolej smotal alaj vera  
Puklaj šajba od šofera

Šteta će se kašnje zbrajat  
Svirka neće dugo trajat  
Samo do aperitiva  
Najvažnijej glava živa

Do nazad su tamburaši  
Konja našli na ispaši  
Srića bil je v jednon deli  
Inače bi va šniceli

Oporukaj ove ture  
Nove žici za tambure  
I za transport JANEZ mari  
Jednog džipa za safari

- - - -



Udrugij pustil na šanki  
Dva čeka Ljubljanske banki  
Za tombule i za pića  
Ako nisu bez pokrića

Z žepa jedan nacrt viri  
Kako da se dom proširi  
Da se nutri lakše diše  
V oporuki isto piše  
- - - -

Potpleta sej sital lvi  
Neka dugo još poživi  
Ministar je od prometa  
Ive Potplet il Kalmeta

Kalmetaj bil bome kadar  
Preuredit celi Zadar  
A Ivanuj uspješnica  
Do svog dvora prometnica

Za toga našega bosa  
Kilo farbi z Heliosa  
Da se cisti vide rebra  
Da saki zna kadij zebra

Srića bi nan bila vela  
Poglavar iz sakog sela  
A i načelnik daj hrabar  
Ne bi Bribir bil ko Dabar

- - -  
Još na kraji reć se mora  
Sital sej i autora  
Pazil je na staru benu  
Ostavil muj svoju ženu

Poštenaj nij njuferica  
I po ocuj Hrvatica  
Pa kletu dok ovo piše  
Nek mu se na jajih njiše

- - -  
Ča san mislel to san rekal  
Šentenciji kraj dočekal  
Više niš va ostavini  
Gremo ća sa ove bini

Još je kigod biser mali  
Koga nisan rekal v sali  
Čut očete na sprogori  
Ako još se ća dogodi

HOTE DOMA, LIPA FALA  
JOŠ HRVACKA NIJ PROPALA!  
TAMBUR

